



## 蘆花開，來去蘆洲心花開

「蘆竹若開花，隨風颼颼飛。」這是古早的蘆洲，上蓋有特色的風景。暗頭仔，月娘出來的時，風輕輕仔吹，月光照佇蘆花頂頭，親像海湧咧跳舞全款，講有佱嬌，就有佱嬌。

蘆洲較早的地號名，有足濟種講法，上早的講法是「河上洲」。因為較早是沙洲，親像蹠佇河的頂面全款。另外一个講法是叫做「和尚洲」。清朝時代，彼當時的地主，大部份攏共土地捐予廟寺，閣共廟寺租來種作，用田佃的身份，減少納稅。一般人將遮叫做和尚厝，嘛叫做和尚洲。

蘆洲有一个人工湖，號做「微風運河」，佇遮會當釣魚、划船仔，遮的運動足時行。佇岸邊，有人騎腳踏車，有人散步，運動兼看風景。遐的風景，對透早到暗時，攏無全款喔！早起會當看著日頭光佇湖的面頂跳舞；下晡日頭欲落山的時，觀音山恰淡水河，親像做伙恰日頭講再會；暗時月光來鬥幫贊，湖面閃閃爍爍，親像一葩閣一葩的電火，予來遮的人有倚靠。倚佇岸邊，看遮爾嬌的風景，煩惱攏暫時擲掉，心情輕鬆足逍遙。

佇蘆洲，有一間三級古蹟的古厝，彼就是蘆洲李宅，到今已經超過一百年的歷史矣。上蓋特別的所在，無用杉仔，是用磚仔、石頭鞏起來的。李宅攏總有九个廳，六十間房間，嘛因為較早遮是田地的尾溜，逐家攏共遮號做「田仔尾」。厝前有一窟蓮花池，若是好天的時，會當看著照佇水面的觀音山，足趣味！

來到李宅，毋但會當看著古早時代的八跤眠床、鏡台，行過灶跤、飯廳，嘛會當予你想起細漢的時，恰阿公、阿媽做伙生活的記持。下晡時仔，日頭光對窗仔，微微仔迴入來房間，彼種古早的氣氛，予你佇遮會當數念囡仔時代的甜蜜。

綴時代進步，蘆洲的發展嘛愈來愈緊。捷運、快速道路，交通的利便予遮愈來愈鬧熱。有閒來遮食一碗掟仔麵，行一逝湧蓮寺，蘆洲一定有你懷念的古早味。

作者：魏俊陽

### ☆詞彙學習☆

【颼颼飛】iānn-iānn-pue：四處飛揚。

【海湧】hái-íng：海浪。

【透早】thàu-tsá：大清早、七早八早。

【鬥幫贊】tàu-pang-tsān：幫助。

【尾溜】bué-liu/bé-liu：事、物的末端、頂端。

【窟】khut：計算窪、穴的單位。

【灶跤】tsàu-kha：廚房。

【記持】kì-tí：記憶、記性。

【迴】thàng：通達、穿透。

【數念】siàu-liām：想念、掛念、懷念。

【掟仔麵】tshik-á-mī：一種臺灣傳統麵食。利用類似竹籠的撈麵用具，在熱湯中上下搖晃抖動，待煮熟後，再加上湯頭和佐料而成。